

EKALESIA FAAPOTOPOTOGA KERISIANO I AMERIKA SAMOA

OFISA O A'OA'OGA KERISIANO



VASEGA AMATA



FEPUARI - IUNI

2025

<u>MASINA/ ASO</u>	<u>FA'ASOLOGA O MATUPU</u> <u>MATAUPU</u>	<u>TUSI FAITAU</u>
1. Fepuari 02, 2025	O le foafoaina o mea uma	Kenese – 1: 1 - 25
2. Fepuari 09, 2025	Na faia le tagata I lona faatusa	Kenese – 1: 26 - 31
3. Fepuari 16, 2025	O Atamu ma Eva	Kenese - 2: 4 - 17
4. Fepuari 23, 2025	MATAUPU FAAMANATU	
5. Mati 02, 2025	O le la'au e iloa ai le lelei ma leaga	Kenese – 3: 3
6. Mati 09, 2025	O le fa'aosoosoga	Kenese – 3: 1 - 5
7. Mati 16, 2025	Ua pau'u Atamu ma Eva	Kenese – 3: 6 - 8
8. Mati 23, 2025	O le fa'aola ua folafolaina	Kenese – 3: 14 - 19
9. Mati 30, 2025	MATAUPU FAAMANATU	
10. Aperila 06, 2025	O Sakaria ma Elisapeta, O le fa'aaliga I le malumalu Ua gugu Sakaria	Luka – 1: 1 - 13
11. Aperila 13, 2025	Na tietie mai le tupu I le asini (Aso Sa Laupama)	Mareko -11: 1 -11
12. Aperila 20, 2025	Ua toetu Iesu (Aso Sa o le toetu)	Mataio – 28: 1 - 10
13. Aperila 27, 2025	MATAUPU FAAMANATU	
14. Me 04, 2025	O le feau na fa'aalia ia Maria	Luka – 1: 26 - 35
15. Me 11, 2025	O le asiasiga a Maria ia Elisapeta (Aso Sa Tina)	Luka – 1: 39 - 56
16. Me 18, 2025	Ua toe foi Maria I Nasareta	Mataio – 1: 19 - 21
17. Me 25, 2025	MATAUPU FAMANATU	
18. Iuni 01, 2025	Ua fanau mai loane le papatiso	Luka – 1; 61 - 79
19. Iuni 08, 2025	O le a le uiga o le upu Penetekoso (Aso Sa Penetekoso)	Galuega – 2: 1 - 4
20. Iuni 15, 2025	Ua avea Isaako e osi ai le taulaga	Kenese – 22: 1 - 19
21. Iuni 22, 2025	MATAUPU FAAMANATU	

## **TUSI VASEGA AMATA**

**FEPUARI 02, 2025 – IUNI 22, 2025**

### **MASINA O FEPUARI - "O LE FOAFOAINA O MEA UMA E O' O IA ATAMU MA EVA"**

**ASO SA – FEPUARI 02, 2025**

**MATAUPU – "O LE FOAFOAINA O MEA UMA"**

**TUSI FAITAU – KENESE -1: 25 (Ia faitau ma'ea e lau Susuga le tusi faitau mo au tapenaga)**

**SINI** – Ia a'oa'o ia iloa atili ma fa'amasani pea tamaiti i le amataga o mea na faia e le Atua.

**FESOASOANI MO LE FAIAOGA** – Fa'afeiloa'i ma fa'atalofa atu i ā outou Susuga i Faiaoga o le tatou vasega i lenei ulua'i Aso Sa o a'oa'oga i lenei foi tausaga. Manuia lava le tausaga fou! Fa'afetai tele le onosa'i ma galulue i le na tausaga ua te'a. E fa'aauau pea le tu'uialalo tau'ave mo a outou Susuga ina ia tautuanā lau tapenaga o le mataupu i le vaiaso a'o le'i o'o i le Aso Sa e fa'atino ai. Ia lava se taimi e te tapena ai e ala i le Tusi Paia ua tu'uina atu e fesoasoani ai i le mataupu. Fa'amoemoe pea i le Agaga o le Atua o le ā manuia ai faiva o lenei tausaga. Faamolemole, o le tusi ua tu'uina atu e mo lau Susuga a le Faiaoga, ae lē mo le fanau. Manuia tele le galuega o lenei tausaga.

**SINA FA'AMATALAGA O LE MATAUPU** – I aso lava ia tamaiti. I le amataga o mea uma, fai le tala a le Tusi Paia sa nunumi ma gaogao lo tatou lalolagi. Ona va'ai (silasila) ane lea o le Atua, ma ia fai ai loa le lalolagi matagofie lea ua tatou ola ma fiafia ai. Na faia e le Atua le la e fa'amalamalama ai le aso. Na ia faia foi le masina ma fetu e fa'amalamalama ai le po. Na ia faia le lagi ma le fogā'ele'ele atoa ma le sami. Na ia faia manu e felele i le lagi, o i'a e fe'ausi i le sami, ma manu mo le fogā'ele'ele. Na fa'ata'amilo le matamata (maimoa) a le Atua i ana mea na fai, ma sa fa'amalieina ai o ia. Ua lelei atoatoa. Ua ma'ea saunia lelei le lalolagi mo tagata. Ona sauni loa lea o le Atua e fai le tagata o le tane ma le fafine. – O Atamu ma Eva.

**GALUEGA FA'ATINO –**

1. O le tala ua masani ai tatou, peita'i, e taua lava le tapenaga ina ia taofi mau e le fanau le tala amata lea o le Tusi Paia.
2. E fautuaina pe afai e maua ni ata mo le fanau e fa'amatala fa'atasi ma va'ava'ai i ai e faigofie ai ona maua e tamaiti.
3. Afai e leai, ia tusi e lau Susuga ni ata e fa'atatau i le faiga o le lalolagi. Ua fa'apu'upu'u atu le fa'amatalaina, ae o i lau Susuga le fa'alauteleina e fua i le taimi.
4. E fautuaina le amata ona fa'ata'it'ai le faitau Tusi Paia a tamaiti i le vasega lea fa'amolemole. (Fa'aaoga sina 7minute mo lea vaega taua).
5. E lelei foi ae tufa ni pepa mai peni e tusi ai e tamaiti ata o mea na faia i lea aso ma lea aso, ma taumafai e fa'aigoa.
6. E mafai foi ona fa'aaoga le Tala Tusi Paia mo au tapenaga amata mo le Aoga Samoa a le fanau i lenei tausaga.
7. Fa'amolemole fa'amalamalama uiga o upu e faigata i fanau.

E leai se a'oa'oga sili ona taua o le mataupu nai lo le amata ona iloa ma taofi e le fanau le amataga o mea uma, e ala i le fa'afaigofie ia i latou. Taumafai pea e fesilisili ma fa'amatala le tala, e lelei foi ma atoatoa pe ā fa'atino.

**MANUIA TELE LE AMATAGA O GALUEGA O LE NEI TAUSAGA**

**ASO SA – FEPUARI 09, 2025**

**MATAUPU - “NA FAIA LE TAGATA I LONA FA’ATUSA”**

**TUSI FAITAU – KENESE – 1: 26 - 31**

**SINI** – la a’oa’o atili tamaiti ia taofimau, o le Atua lava na faia le tagata i lona fa’atusa.”

**FESOASOANI MO FAIAOGA** – O le taumafaiga ua amataina atu, o se manatu ina ia fesoasoani le Aoga Aso Sa a le fanau, e fa’amatala ai tala o le Tusi Paia, e fesoasoani mo Aoga Samoa o le a feagai ai. E lē o se galuega faigofie foi, ae ua manatu ia fa’aogaina avanoa e o fa’atasi ai ia fa’amoemoe, aemaise o le mamafa i fanau i le tele o mea’aoga e feagai ai. Ae manatu o le a telē se malamalama o le fanau o le a maua ai, ma se fa’amāmā avega ia outou Susuga i Faiaoga, fa’apea le ‘Aufaigaluega. O le mea lea e fautuaina malosi ai lava lau tapenaga fa’amolemole. Ia fa’aogaina lava le Tusi Paia e a’o ai le faitau, e mafai foi ona silasila ane i le Tala Tusi Paia, ua fa’aogaina sa’o atu lava ulutala, ma se fesoasoani atu i le fa’apuina ina ia pu’upu’u ma faigofie mo tamaiti. Manuia tele lau tapenaga.

**SINA FA’AMATALAGA O LE ULUTALA** - O le uma ona faia o mea uma e le Atua i aso e ono, ona ia silasila atu lea i mea na fai e ia, oka! se aulelei, **“ua lelei”** Peita’i, tamaiti, fai mai sa mana’o lava le Atua e faia se tasi e sili i mea uma na ia faia. Fai mai ua fetalai ane le Atua, “Ina tatou faia ia o le tagata i lo tatou fa’atusa, ia foliga iā i tatou, ia pule foi i latou i i’a o le sami, ma manufeleei ma isi mea uma. Tamiti fai mai ona tago atu loa lea o le Atua ua faia le tagata. Tou te iloa la na fa’apefea ona faia e le Atua le tagata? Ia fa’alogo lelei mai la, ua tago atu le Atua ua fa’apopototo le efuefu po’o le ‘ele’ele, ona ia mānava atu lea i ona poga’i isu o le mānava ua i ai le ola. Ioe, o le taimi lava na mānava atu ai le Atua i le ‘ele’ele, na avea ai loa le ‘ele’ele ma tagata ola. Tatou te ofo i faiga a le Atua a tamaiti, o lona uiga o tatou na faia e le Atua i le ‘ele’ele a ea? Na ma’ea loa le faiga o le tagata tamaiti, fai mai na matuā fiafia le loto (finagalo) o le Atua, ina ua va’ai atu ua matuā lelei mea uma lava na ia faia. Ona ia malōlō loa lea mai ana galuega i le aso lona fitu, ma avea ma aso malōlō mo tagata uma, e manatua ai le agalelei o le Atua. Tamaiti, e le’i fa’atagā faia i tatou e le Atua, ae ua matuā lelei, lelei lava ma atoatoa, ua tā ola.

**GALUEGA FA’ATINO** -

1. Fa’amatala le tala i le fesoasoani ua tu’uina atu ina ia faigofie i tamaiti, ae lē taofia ai au metotia na tapena mo le mataupu.
2. E lelei foi ae tapena ni palapala e fa’ailoa i tamaiti, ona fa’aputu lea ma fa’atino gaioiga na fai ai le tagata i le mānava i le ‘ele’ele ma ola ai le tagata.
3. E mafai foi ona ave i fafo mai le Falesa ma fa’atino ai i se ‘ele’ele latalata ane.
4. Manatua e gata le fa’amatalaina o le mataupu lenei i le malōlōga i le aso fitu.
5. Manatua lava e tataua ona fa’amanatu pea fesili fa’atatau i le vaega lea o le tala, ma aua nei galo fa’amolemole, ia fa’amatala uiga o upu ia taofi mau e tamaiti.
6. O se pese e te saunia i lau tapenaga, e mafai ona fa’ai’u ai le aoga i lenei Aso Sa.

O le fa’ai’uga o le mataupu, e fautuaina lava fesili e aga’i tonu i le vaega lea, ia fesoasoani mo i latou i le aga’i atu i le lumanai. Afai e te manatu i se a’oa’oga, ia fa’amamafa lau silasila i se tasi a ia faigofie ona taofi e fanau, ma malamalama ai. Tasi ae ‘anoa.

**MANUIA LE ASO SA, FA’AFETAI LE ONOSA’I**

////////////////////////////////////

**ASO SA – FEPUARI 16, 2025**

**MATUPU – “O ATAMU MA EVA”**

**TUSI FAITAU – KENESE – 2: 4 – 17**

**SINI** – la fa’amanatu atili pea le iloa ma taofi mau e fanau ulua’i tagata na faia e le Atua, ma sina fa’amatalaga itiiti mo i laua.

**FESOASOANI MO FAIAOGA** - O le fa’amanatu lava e lē tu’ua mo a outou Susuga fa’amolemole, e mafanafana lava le galuega a’oa’o atu, pe afai e lava tapena mai i le vaiaso. E faigofie a tatou mataupu, ona o le fa’amomoe ia maumauta’ia le fa’avae o le iloa o le Tusi Paia e fanau. O le mea lea e fa’amolemole atu lava se’i tautuana le tapenaga ia atoa mea uma ua e finagalo e fa’atino ai le mataupu o Aso Sa ta’itasi. Manuia tele galuega o le nei Aso Sa.

**SINA FA’AMATALAGA PU’UPU’U MO LE MATAUPU** – Ina ua uma ona faia e le Atua o Atamu ma Eva, ona tu’u lea o i laua la te va’ava’aia le lalolagi fou a le Atua. O ulua’i tagata foi ia na faia e le Atua. O le la galuega e fai i le fa’atoaga, o le tausi ma va’ai la’au, o manu felelei ma i’a ma manu uma o le fanua. Na ave e le Atua Atamu ma Eva ma tu’u i se nofoaga fa’apitoa ma le matagofie e nonofo ai. Fai mai o le nofoaga lea, sa i ai vaitafe e fa’asūsū ai, o la’au e fa’apaolo ai, ma le tele o ituaiga fua o la’au e ‘aina. Sa fa’aigoaina lea nofoaga, o le fa’atoaga lea o “Etena” - **o lona uiga o le “fiafia.”**

Sa matuā fiafia Atamu ma Eva i le la galuega. Ae na o le tasi le mea na fai i ai le Atua, ia aua lava ona laua faia. Aua ne’i laua pa’i pe a’ai i le fua o le la’au fa’apitoa e tasi sa i totonu o le fa’atoaga. “O le la’au e iloa ai le lelei ma le leaga” Na fai atu le Atua ia i laua, o le taimi lava lua te a’ai ai pe pa’i i le la’au le na , o le ā feoti ai oulua. Sa feola lava i laua o ni uo a le Atua, ma sa la faia foi pei ona mana’o iai le Atua.

**GALUEGA FA’ATINO –**

1. E fa’utuaina pea le tapena o ni pepa ma ni vali mo tamaiti ina ia mafai ona fa’alogo ma tusi ni ata e fa’atatau i le mataupu.
2. E mafai foi ona fa’atino i se talanoaga mai le Tusi Faitau le tala, e talitonu lava o le a vave ona pu’e ma maua e tamaiti ni fesili mulimuli ane.
3. E fautuaina foi le amata i le vasega lea ona a’o ai le faitau Tusi Paia i se 10minute o le vasega, ina ia lelei le fa’aleoina o upu.
4. Manatua, e taua lava ni nai fesili faigofie mo le manatua o tamaiti.
5. E lelei foi ae fa’aaoga le tala Tusi Paia mo au tapenaga e lautele ai le mataupu, auā o le fa’amoemoe lea, ia fesoasoani atu i le amata tapena o le fanau mo le Aoga Samoa.

O le a’oa’oga o le mataupu, e fautuaina lava le mautinoa ua amata ona malamalama le fanau i le tala, ia silafia foi ua tu’uina atu lava i vaega lenei tala, e fesoasoani ai i le amata tapena o le fanau ia mo le Aoga Samoa.

**MANUIA LE GALUEGA O LENEI ASO SA**



**ASO SA – FEPUARI 23, 2025 “MATAUPU FA’AMANATU O FEPUARI”**

**MATAUPU – FESILI MA TALI**

1. la fa’amanatu ma fa’amautū mai le mataupu muamua o le masina, aso na fai ai le lalolagi, ma mea na faia ai.
  - Fa’ata’ita’iga : aso muamua e o’o i le aso ono, ma mea na faia ai.

- E fia aso na faia ai le lagi ma le lalolagi?
  - O a mea na faia i aso ta'itasi?
2. Ia fesilisili fa'afaigofie pea i tamaiti, pe na fa'apefea ona faia le tagata i le fa'atusa o le Atua.
- Fa'amatala i'inei le 'ese'esega o le faiga o le tagata ma isi mea uma o le fofoaga a le Atua i le amataga. Fa'amatala ma fa'atino ia faigofie ai.
  - O le a le mea na fai e le Atua i le aso fitu? Aiseā e taua ai mo le tagata.
3. Ia fa'amatala ma fa'amautinoa ua maua e tamaiti uiga o upu o lo'o i le vaega lea.
- Atamu, Eva, Etena
  - Fa'amanatu igoa o vaitafe na fa'asūsū ai le fa'atoaga ma le aofa'i o vaitafe aua ne'i toe galo i fanau.
  - O le a le galuega a Atamu ma Eva na tu'u i ai e galulue ai i le faatoaga?
  - O ai na muamua faia e le Atua?
  - Aiseā na faia ai Eva?

Ou te ioe i le lava o le taimi o le aoga i Aso Sa, fa'aolemole e mafai lava ona toe fa'aupu ma fesuia'i upu o le fesili ae tumau lava le tali, ina ia amata ona iloa e fanau e lē na o le tasi se ala e fa'aupu ai fesili. Ae ia tautuana ia tumau lava i le figofie o le gagana ma pu'upu'u. Aua le vave fiu lau Susuga a le faiaoga faamolemole.

**MALO LE TAPENA, FAAFETAI LE ONOSAI**



**MASINA O MATI – “O LE LA’AU E ILOA AI LE LELEI MA LE LEAGA, E O’O I LE FA’AOLA UA FOLAFOLAINA”**

**ASO SA – MATI 02, 2025**

**TUSI FAITAU – KENESE – 3: 3**

**MATAUPU – ‘O LE LA’AU E ILOA AI LE LELEI MA LE LEAGA”**

**SINI** –“ Ia a’oa’o atili le fanau ia manatua le fa’atonuga na fai ia Atamu ma Eva ina ua tu’u i le fa’atoaga i Etena”

**FESOASOANI MO FAIAOGA** – Fa’amalō le onosa’i i lenei foi taeao fou. Fa’afetai le usu, manatu o lo’o maua le soifua laulelei auā le galuiega fa’aaauu o lenei Aso Sa. O loo fa’aaauu pea le fa’agasologa o tatou mataupu mai le Tala Tusi Paia auā le fa’amoemoe e pei ona taua i le amataga. Manatu lava ua maua se ta’iala lelei e tapena ai ai lau Susuga auā fanau. Tautuanā lava ia lava se taimi e te lua mafuta ai ma le Tusi Paia i le vaiaso, a’o lenā ua fa’apu’upu’u ma fa’afaigofie atu mo lau Susuga a le faiaoga. Fa’amolemole fa’amatala lava i le mea o lo’o i ai i le Tusi Paia. Fa’afetai tele le lagolago mai.

**SINA FA’AMATALAGA MO LE MATAUPU** – Na matuā fiafia le loto (finagalo) o le Atua ina ua tu’uina atu Eva e fai ma fesoasoani o Atamu, ma ua tu’uina i laua e leoleo ma galulue i le fa’atoaga i Etena. Sa taga mea uma o le fanua ona a’ai ai ma ola ai. Peita’i, sa tu’uina i ai e le Atua le tasi fa’atonuga mo i laua. Fai mai le fa’atonuga tamaiti, e sā ona tago pe a’ai i le la’au e tasi o le fanua ua igoa, **“o le la’au e iloa ai le lelei ma le leaga”** Ua fa’ataga la’au uma o le fanua, a ua fa’asā le la’au e tasi tamaiti, Fai mai le Atua iā Atamu ma Eva, aua ne’i lua pa’i pe a’ai i fua o le la’au e iloa ai le lelei ma leaga, auā o le aso lua te pa’i i ai pe a’ai ai foi, o le i’uga o ouluga o le oti. (Kenese 3: 3). Tamaiti, ua lē ta’ua mai ia i tatou pe fia ni aso na

usiusita’i ai Atamu ma Eva i le Atua i lea fa’atonuga, ae o le mea ua tatou iloa tamaiti, na soli e Atamu ma Eva le fa’atonuga. Tamaiti,matuā leaga tele le lē usitai i le Atua, auā e tupu ai le malaia.

### **GALUEGA FA’ATINO**

1. O le fa’atinoga lava e pei ona iai mataupu ua saunia atu, ua silafia lava le fa’amoemoe e pei ona taumafai atu ai.
2. Fa’amatala fa’afaigofie le tala ma fa’atino i ni taga po’o ni mea faitino foi.
3. Afai e le’i tapenaina lea itu, ia taumafai ni pepa ma ni peni e tusitusi ai tamaiti.
4. Aua ne’i fa’atalalē i le faituina o le Tusi PaiA fa’amolemole.
5. Fa’aopoopo i ai e lau Susuga nisi metotia ia vave ona malamalama le fanau ma taofi mau.

Afai e saunia se a’oa’oga mo lenei vaega o le tala, o le fautuaga lava ia tasi lava pe lua, a ia mautinoa le taofi e le fanau. Manatua o le fa’amoemoe lava ia saunia fanau elē gata ia iloa tala o le Tusi Paia, a ia fesoasoani i le tapenaga mo le Aoga Samoa ia tu’u māmāina le galuega mo outou faiaoga.

### **MANUIA LE ASO SA MA ONA TAPUAIGA**



#### **ASO SA – MATI 09, 2025**

#### **MATAUPU – “O LE FA’AOSOOSOGA”**

#### **TUSI FAITAU – KENESE – 3: 1 - 5**

**SINI** – Ia a’oa’oina tamiti i le fa’aosoosoina o Atamu ma Eva e le gata, na mafua ai ona pau’u i laua ma tulia ese ma le fa’atoaga.

**FESOASOANI MO FAIAOGA** – E fa’amanatuatu i a outou Susuga, o le taumafaiga atu i lenei tausaga, ia fesoasoani mataupu o le Aso Sa , i le galuega o le Aoga Samoa i tala o le Tusi Paia. Ina ia māmā le galuega i lea vaega. O le mea lea ua fautuaina ai lava le Tusi Paia e a’o ai le faitau, ma le Tala Tusi Paia e fa’aaoga fa’atasi e lau Susuga mo lau tapenaga i le a’oa’oina o le fanau. Malo lava le tapena, malo le onosa’i.

**SINI FAAMATALAGA MO LE MATAUPU** - E ui lle fiafia o Atamu ma Eva i le fa’atoaga na nonofo ai, peita’i, sa i ai se tasi sa mana’o e fa’aleaga le lalolagi na faia e le Atua. O le fili foi lea o le Atua ma mea lelei uma, o ia foi sa matamata i le faiga o le tagata. I se tasi aso a’o savali ane Eva i tafatafa o le la’au fa’apitoe e iloa ai le lelei ma le leaga, ae ia fa’alogoina ai le leo o le gata. Eva! Va’ai i le manaia o fua o le la’au. Fa’amata e le o tafe lou fāua i lo’u manao i ai? Aiseā e te lē tago i ai e tofo i ai? Eva e te lua lē oti ai lava, o le fua lena o le la’au e te lua maua ai le poto. A lua a’ai ai lua te popoto ai fa’apei o le Atua. Tamaiti, sa matuā fa’alogologo lelei Eva i le leo malū o le gata i lea taimi. O le fili lea ua ta’ua i le Kenese **o le gata**, ae ua fa’aigoaina foi i le igoa **Satani**, po’o le **tiāpolo**. Tamaiti, e i ai uiga o ia igoa, o le igoa Satani o lona uiga o le **“o lē ita mai”** ma le tiāpolo, o lona uiga o le **“tu’ua’i fua”** E lelei ma suamalie upu a le gata taufa’aosooso, auā ua ia fai ia Eva, *lua te lē oti lava*, a’o le taimi lua te a’ai ai, o le ā pupula ai o laua mata, o le ā avea i laua pei ni atua, o le a iloa le lelei ma le leaga.

#### **GALUEGA FA’ATINO –**

1. Ia a’o’ao pea le faitau aua le tu’ua, ma fa’amasani pea le fanau i le fa’aleoina sa’o o upu.
2. Ia manatua o le fesoasoani tele lea mo le amata tapenaina o le Aoga Samoa i mataupu o le tala Tusi Paia a fanau o le vasega lea..

3. Ia tu'ufesili pea ma fesili pea ina ia taofi mau i latou e fa'atatau ia o'o atu i le Aoga Samoa ua malamalama i mataupu uma ma fesili o le tala Tusi Paia..
4. Fa'aaoga pea ata ma tusitusiga e fa'amalamalama ai le mataupu, ma fa'amasani ai i latou i le maitauina lelei o tali i fesili e te fesiligia ai.
5. Silasila i upu ma o latou uiga o lo'o i le mataupu ia a'oa'oina so'o pea i fanau ia aua lava ne'i toe galo
6. Ua e silafia lava metotia e a'oa'oina ai le mataupu, fa'amolemole aua le taofia.

Fa'aaauu pea fesili mo le fa'amautuina i mafaufau o fanau le mataupu, ma toe fa'amanatu ma fa'amanatu pea. Afai foi e te manatu ia fai sina a'oa'oga mo tamaiti, ia lava se tasi mo i latou ae o le falamamafa, ia amata tapena i latou mo Aoga Samo o lenei tausaga.

**MALO LE ONOSAI, FA'AFETAI LE GALULUE.**



**ASO SA – MATI 16, 2025**

**MATAUPU – “UA PAU’U ATAMU MA EVA”**

**TUSI FAITAU – KENESE 3: 6 - 8**

**SINI** – “Ia a’oa’o ma fa’amanatu i tamaiti le i’uga na o’o ia Atamu ma Eva ina ua lē usita’i i le fa’atonuga a le Atua”

**FESOASOANI MOLE FAIAOGA** – Fa’atalofa i a outou Susuga i lenei taeao. Malo le lagi e mamā ma le soifua manuia. Fa’afetai le onosa’i. Fa’aaauu pea le tatou galuega, o le tu’ualalo masani fa’aaauu pea, ia tautuana lau tapenaga o le vaiaso ia fa’amalolosi i ai. E leai lava foi se fa’amoemoe o le ā tu’u maotua se tapenaga mo fanau ia. O le fautuaga ia aga’i pea i le Tusi Paia ma nisi tusi e pei o le tala i le Tusi Paia. Ia faigofie mo le fanau ona malamalama, ma ia taumafai e fa’amalamalama ta’titasi ni upu po’o ni fuaiupu e ona faigata ai le momoliina o le tala i fanau ma nenefu ai. Faamoemoe lava ile tatalo I le Agaga o le Alii, e fesoasoani i lo tatou vaivai. Malo le fa’amalolosi.

**SINA FA’AMATALAGA MO LE MATAUPU** – Tamaiti, fai mai le tala, na fa’aleaga ma fa’ata’uvalea e satani le alofa o le Atua iā Atamu ma Eva. Ina ua uma ona fa’aosoosoina le fafine e le gata, fai mai ua tilotilo a’e o ia i le fua o le la’au, ua matuā manaia lava i le ‘ai. O le mea lea na matuā galo ai lava ia Eva le agalelei ma le alofa o le Atua . Sa mana’o o ia ia poto fa’apei o le Atua, ona a’apa atu lea o lona lima ma tau le fua o le la’au ma ‘ai ai. Sa ia avatu foi se vaega ia Atamu ma ‘ai ai foi o ia. Tamaiti, mai lena lava ituaso sa amata ai ona leaga mea uma. Na iloa lelei e le Atua le mea leaga na faia e Atamu ma Eva, auā e leai se isi e mafai ona nanā se mea mai le Atua. O i’ina na amata ai ona lē toe uo lelei Atamu ma Eva ma le Atua, ona tutuli ese ai lea o i laua ma le fa’atoaga I Etena. Ua pau’u i laua i luma o le Atua ma o ese mai le fa’atoaga sa fiafia ma ola ai, sa feofeo’i ma talatalanoa ai ma le Atua. Na saunia foi e le Atua kerupi po’o agelu e tutū ma pelu afiafi e leoleo ai le fa’atoaga . Ua lē usita’i i laua ona ua fia pei o ni atua, ua o’o ina pupula leaga o laua mata , ae ua lē tupu ai se fiafia, ae ua na o le mā ma le lotoleaga, ma le fefe vale i le Atua, e pei o le fefe a le pologa i lona matai. (Kenese- 3: 6 – 8)

**GALUEGA FA’ATINO**

1. Fa’amatala le tala ma saunia ni fesili e fa’amautu ai le iloa ma le malamalama o tamaiti.
2. Afai na tapena ni mea faitino ua matuā sili atu lenā i lo’o se isi lava fa’atinoga.
3. Ia mulimuli pea i le Tusi Paia ma le fa’agasologa o le tala.



4. Aua le tu'una le faitauina o le Tusi Paia fa'amolemole.
5. Silasila ane i le tala Tusi Paia e fa'aaoga fa'atasi ma le Tusi Paia, e manino ai lau tapena ma le fa'amatalaina.

Ua amata ona vavala mai ni nai a'oa'oga faigofie mo fanau, e lelei pea le fa'amanatu i ai, o le lē ususita'i ma le lē fa'alogo i le Atua e i'u i le leaga. Aua le fa'alogogatā i le Atua, po'o matua foi, auā o matua na fanauina i tatou, o sui o le Atua e tausi ma a'oa'o i tatou le fanau. 'Alo'alo ese mai uo tau fa'aosooso i mea leaga ia i latou.

**MANUIA LE AOGA I LENEI ASO SA.**



**ASO SA – MATI 23, 2025**

**MATAUPU – “O LE FA’AOLA UA FOLAFOLAINA”**

**TUSI FAITAU – KENESE 3: 14 – 19.**

**SINI** – “Ia fa’amatala ia manino i tamaiti sala a Atamu, Eva, ma le gata, ma le fa’aola ua folafolaina.

**FESOASOANI MO FAIAOGA** – Fa’afetai le fa’amalolosi, manatu lava o lo’o gasolo lelei pea le fa’amoemoe o lenei vaitau ina ia fa’amāmā ma faigofie le galuega mo fanau ma outou. Fa’amolemole aua nei uma le fa’amanatu pea o mataupu ua te’a ina ia soso’o lelei le tala ma le aga’i atu i luma . Fa’afetai le lagolago mai malo le onosa’i. Fa’amanuia atu le Atua. E lelei lava le Alii.

**SINA FA’AMATALAGA MO LE MATAUPU** – E ui lava ina ua tulia ‘ese Atamu ma Eva mai le fa’atoaga o le fiafia, ae le’i tu’ulafoa’iina e le Atua lana tagata na fai. Ua mafaufau le Atua tamaiti, e tatau ona toe fa’aolaina le tagata mai lona sesē. Talofa e, i le Atua a tamaiti? manatua, e lē o le tagata na amata sesē, a’o le tiāpolo po’o satani, o le fili lea e ita tele i le Atua. E lē iloa e Atamu ma Eva o le mea o’ona ma le leaga le lē ususita’i i le Atua. Ona fa’asala lea o i latou e le Atua, se’i a’oa’oina ai ma ia salamō. O le fa’asalaga o Eva – *“o le a fanau ma le tigā au tama, e ua’i atu lona mana’o i lana tane, e pule foi lana tane i ate ia”* O le sala a Atamu – *“E malaia le laueleele ia te ia, o le a tutupu ai la’au tuitui ma talatala, e ‘ai ma le afu ana meaa.”* O le sala a le gata – *O le a sili lona malaia i manu vaefa ma manu uma o le fanua i le vao. O le a sosolo i lona manava. Ua fetalai mai le Atua, na te fa’atupuina le fe’itaga’i ia te ia ma le fafine. O lau fanau ma lana fanau, na te tu’imomoina lona ulu, a’o oe na te tu’imomoina lona mulivae.*

Tamaiti, o le Fa’aola ua folafolaina nei, o Iesu. O Iesu, o le a fanau e le fafine ua taua i lenei upu (Kalatia – 4: 4). O le a ia tu’imomoina o le ulu o le gata, o le galuega lea a Iesu, na ia fa’ato’ilaloina ai le tiāpolo, ma ia laveaiina ai tagata agasala i le togioala na ia faia. (Kenese – 3: 13 – 19) Aisea tamaiti? loe! e alofa tele le Atua iā i tatou uma.

**GALUEGA FAATINO –**

1. E tumau lava le tapenaga o galuega a lau Susuga i ala e pei ona fautuaina atu, ae lē taofia ai le mea sili ua e silafia e faigofie mo le fanau ona malamalama ma taofi i ai.
2. Ia lava le taimi e fa’amalamalama ai i ni fa’atinopga eseese e te silafia e pu’e gofie ai e tamaiti ma taofi.
3. Manatua e eseese lava auala e mafai ona maua ai e fanau le malamalama’aga o le mataupu.
4. Fa’amanatu pea le faitau Tusi Paia fa’amolemole.

O le lava o le taimi, e mafai ai ona fa’asoa se a’oa’oga se tasi mo fanau mai le mataupu. O le alofa lava o le Atua e lē uma i lana tagata na fai, po’o le ā le leaga o le tagata e tumau lava le alofa o le Atua. O ia foi na saunia lona Atalii o Iesu, e maliu ma toetu e fa’amagalo tagata o le lalolagi. Tamaiti, fa’amasani e alofa iā Iesu ua e iloa, e ala i lou usita’i i ou matua ma amio lelei, faa’aloalo i so’o se tagata. O le Fa’aola lena na folafolaina ina ua pau’u ma agasala o tatou ulua’i matua.

**MALO LE TAPENA, FA’AFETAI LE A’OA’O, VIIA LE ALII**



**ASO SA – MATI 30, 2025 “MATAUPU FA’AMANATU O MATI”**

**MATAUPU – “FESILI MA TALI**

1. Toe fa’amatala le fa’atonuga a le Atua na fai ia Atamu ma Eva, ina ua tu’uina i laua i le fa’atoaga?
  - Fa’ataua pea i le fa’amanatu le lē usiusita’i ma le lē fa’alogo o Atamu ma Eva i le Atua, ua afua ai le malaia tele. O le a’oa’oga taua lava lea i le tutupu a’e o fanau.
2. O le fa’aosoosoga a le fili po’o le tiāpolo.
  - Fa’amanatu ia taofi mau uiga o upu nei Satani, tiāpolo, Atamu, Eva, ma nisi upu e faigata i tamaiti.
  - Toe fesili ma fa’amanatu pea le fa’aosoosoga a le tiāpolo ia Eva?
  - Fa’amanatu ia taofi mau le tali a Eva i le gata na fa’aosoosoina o ia?
  - O le ā le toe tali a le tiāpolo ia Eva, na mafua ai loa ona a’ai i le fua o le la’au?
  - Ia mautinoa ua taofi e tamaiti le igoa sa’o o le la’au fa’asāina, e lē o le apu.
3. Toe fa’amatala ma fa’amanatu le pau’u o Atamu ma Eva
  - Fa’amalamalama ma fa’amatala lelei le mafua’aga na tosina pe gaua’i ai le loto o Eva i le la’au fa’aāina?
  - O le ā le mea na tupu ia Atamu ma Eva ina ua a’ai i le la’au e iloa ai le lelei ma le leaga?

E iai lava le lagona o le vaega taua lena o le a’oa’oina o fanau, ia mautinoa ua gasolo ina malamlama ma taofi mau e i latou ni fesili. E pei lava ona sōsō atu, e taua pea le fa’amanatu i Aso Sa uma, e te silafia ai foi le vaega o vaivai ai i latou ona fa’amalosia lea. E mafai ai foi ona e silafia le fesuia’iga o fesili ae o le tali lava e tasi, i lou silafia o mafaufau o nai fanau ma fua fa’atatau i ai le fesuia’iga ina ia o fa’atasi i latou uma.

**FAAFETAI LE GALULUE, MALO LE FAATOATO**



**“O SAKARIA MA ELISAPETA E O’O I LE GŪGUŪO SAKARIA”**

**ASO SA – APERILA 06, 2025**

**MATAUPU – “O SAKARIA MA ELISAPETA, O LE FA’AALIGA I LE MALUMALU, UA GŪGŪ SAKARIA”**

**TUSI FAITAU - LUKA – 1: 5 - 13**

**SINI** – Ia tulimata’ina le a’oa’oina o tamaiti ina ia iloa po’o ai Sakaria ma Elisapeta i lena Aso Sa.

**FESOASOANI MO FAIAOGA** – O le fa’amanatu masani lava lena mo a outou Susuga fa’amolemole, ia fa’amalolosi pea i le tapenaina o mataupu mo fanau. E sili atu mo i latou i vasega ia le iloa ma fa’alogo ina ia taofi, mo le lumana’i. Afai foi e manatu i ni a’oa’oga, ia aua le tele ma ia lē faigatā, ne’i lē maua. O

lo’o gasolo pea ina matutua ona saili loa lea i a’oa’oga mo i latou ma le olaga. Malo le onosa’i, fa’afetai le tapena.

### **SINA FA’AMATALAGA MO LE MATAUPU – “O SAKARIA MA ELISAPETA”**

E fa’apea le tala, o Sakaria ma Elisapeta, o le ulugalii e leai se la fanau ma ua matutua foi. O Sakaria o le tamāloa, o lana galuega o le ositaulaga i le malumalu, a’o Elisapeta o le fafine.

Sa nonofo i luitaia i le nu’u o Heperona, pe tusa ma le lima tausaga a’o le’i afio mai Iesu. Ua leva ona fa’anana i laua ia maua se la tama, o le mea lea sa fa’anoanoa tele ai. Fai mai le tala tamaiti, ua o’o i le aso ma le taimi na tofia ai Sakaria i lana galuega o le ositaulaga, ona alu lea o ia i Ierusalem i le malumalu e fai ai le taulaga, fa’atasi ma se isi e fa’amū mea manogi o le taulaga. Tamaiti, o le taimi e fai ai lea galuega o le fa’amū o mea manogi i le malumalu mo taulaga i le mea paia, o le iva i le taeao ma le tolu i le afiafi. O ia taulaga e fa’aaogaina ai manu. (Fa’amlemole ia fa’amasani i le tusi faitau e fesoasoani tele i lau tapenaga).

### **O LE FA’AALIGA I LE MALUMALU**

Sa matuā mamalu lea galuega na faia e Sakaria, sa ave e ia le ipu auro tele lava o i ai mea manogi, ma alu i le mea paia e fa’amū ‘ai. I le aso lea, ua te’i Sakaria ina ua o’o atu i le fata auro, o lo’o tu mai ai le agelu, ma ua tautala ane ia te ia. Fai mai le agelu ia Sakaria, aua e te mata’u (fefe), auā ua fa’afofoga le Alii i ana tatalo sa faia i lo la aiga. E ui ina matua ma tele tausaga o Elisapeta lona to’alua, ae o le ā avea o ia ma tinā o se tama tane na te fanauina, na te fa’aigoa foi i le tama o Ioane. *“O le tama foi o le ā fanau mai, o le ā tumu o ia i le Agaga Paia, e lē inu o ia i le uaina (pia), e tusa ma le feagaiga o le naseri. E muamua o ia i luma o le Mesia o lo’o latou fa’atalitali i ai, e saunia le nu’u e fa’atatau mo le Alii.”* (Luka – 1: 17)

### **UA GŪGŪ SAKARIA –**

O se fa’aaliga na matuā ofo ai Sakaria, ma ua amata ai ona tau su’e e ia ni mea e fa’amaonia ai le tala a le agelu. Ua maua o ia i le lē talitonu ona o i laua ma Elisapeta lona to’alua ua matutua, e le toe faigofie ona maua se la tama. Fai mai le agelu ia Sakaria, ona o lou lē talitonu ma lou mana’o i se mea e fa’amaonia ai le fa’aaliga, o lea o le ā tino le na mea ia te oe ina ia e talitonu ai, o le a gūgū oe, e te lē toe gagana pe tautala i se upu, se’ia o’o i le aso e taunuu ai ia mea. (Luka 1: 20). Tamaiti, fai mai le tala, e tupu le fa’aliga i totonu o le malumalu, ae o lo’o fa’atalitali mai tagata ia te ia, ma ua ofo foi tagata ina ua tuai ane o ia i lea aso. Ina ua foi ane o ia mai le potu paia, sa fesili tagata pe aiseā ua tuai ane ai, peita’i, na fa’ate’ia i latou ina ua lē tautala mai o ia i se upu ae ua na o le genogeno ane ia te i latou. Ua uma le vaiaso talu ona tupu o le fa’aaliga, ua toe foi o ia i lona fale. Fai mai na tupu ma taunu’u lava le fa’aaliga a le agelu ia Sakaria. *“Ua to Elisapeta lana ava po’o lona to’alua, ua nofo fa’alilo o ia i masina e lima.* (Luka 1: 24)

### **GALUEGA FA’ATINO –**

1. Fa’atino le vaega mulimuli lenei o le taunu’uga o le fa’aaliga ia Sakaria. Ia fa’at’aita’i i tamaiti aga a le tagata gūgū e lē tautala.
2. O le talanoaga a le aiga i se igoa o le pepe, fai mai le aiga e fa’aigoa ia Sakaria lona tamā, A e fai atu Elisapeta, leai o le igoa o le tama o Ioane.
3. Finau tagata o le aiga, e leai se igoa Ioane i lo latou aiga. Ona latou fesili loa lea ia Sakaria i le igoa o le pepe.
4. Ave ane le papatusi a Sakaria ona latou ofo lea ina ua tusia i lalo e Sakaria, *“O LONA IGOA O IOANE”*

5. “Ma o le ituaso lava lenā na toe matala ai le laulaufaiva o Sakaria ma ua toe tautala. Ona fai lea o le taulaga ma vivi’i i le Atua.

Tele a’oa’oga o le tala, ae fa’amamafa atili pea le iloa ma taofi e tamaiti le gasologa o le tala ma mea na tutupu ai e ala i le fa’atino. O le fesoasoani ua tu’uina atu, ia maua ai ou manatu e fa’afigofie ai le gagana ma le tapenaga. Ia lava pea le lua mafutaga ma le mataupu ua fa’asino i ai le tala.

### **MANUIA LE GALUEGA OLE NEI ASO SA**



#### **ASO SA – APERILA 13, 2025 “ASO SA O LE LAUPAMA”**

#### **MATAUPU – “NA TI’ETI’E MAI LE TUPU I LE ASINI”**

**SINI** – “Ia ave pea le fa’amamafa i le mea na tupu i lenei aso ia taofi mau e fanau se’i o’o ina matutua.

**MAREKO – 11: 1 – 11.**

**FESOASOANI MO FAIAOGA:** O le mataupu o le Aso Sa lenei e fa’atino lava i tausaga uma ma a’oa’oina pea. Po a lava faiga ma fa’amatalaga o le tala lenei, e tumau lava lona moni ma fa’amaoni, o le aso o le malaga fa’atupu a Iesu i Ierusalem a’o lumana’i ai lona maliu. O le mea lea fa’amolemole ua e masani i le tala, a’o le fa’amoemoe ia fa’amatala ma fa’amanino pea i fanau ia aua ne’i toe galo. E mafuli lava le fa’atinoga i aga na fa’atino e tagata a’o aga’i atu le malaga i lea aso. Tautuanā ia aua ne’i faia ua masani ai, a ia tapena pea lau Susuga, o se mea fou fa’atoā tupu, o lona uiga ia fa’ato’aga ona fa’atino. Manuia tele lau tapenaga.

**SINA FA’AMATALAGA MO LE MTAUPU** - O le mana’o o Iesu ina ia auai i le fa’amamaluina o le Tausamiga o le Paseka, (fa’amalamalama faigofie i tamaiti lea ‘aiga), na afua ai ona malaga i Ierusalem. O le latalata ane i Ierusalem, sa ia fai atu ai i le isi to’alua o ona so’o po’o ana uo, ia lua muamua atu i le a’ai po’o le nu’u o i luma atu. O inā lua te maua i ai le asini o nonoa ai. Fai mai le tala tamaiti, o le asini lenei e leai se tasi na ti’eti’e muamua ai. Ona oulua tatala lea ma aumai pe ta’ita’i mai ia te a’u. Afai ae fesili ane se tasi iā te oulua pe aiseā ua tatala ai le asini, ia lua fai i ai e mana’o i ai le Alii, ona lua ta’ita’i mai lea iā te a’u. Ona la aumai lea o le asini ia Iesu, ua ti’eti’e ai o ia, ma alu loa le malaga i Ierusalem. Fai mai na lolofi ane tagata, ma lafo o latou ofu i luga o le asini ma fa’ati’eti’e ai Iesu. Sa tumu ‘autafa o le ala i tagata sa o ane ma latou laupama ma lafo i le auala, ina ua latou fa’alogo ua sau Iesu i Ierusalem. O le latou fiafia lea ua o ane ai e fa’afetaui lo latou tupu ma fa’afeiloa’i ia te ia. O nisi o i latou ua fofola o latou ofu i luga o le auala i ona luma. O isi foi ua sala lālā o la’au ma lafo i le ala, o se va’aiga matagofie tele le sisi i luga o latou laupama ma talotalo atu i lo latou tupu. O le alaga leo tele i lena taeao a tagata fai mai, “Osana ia manuia le afio i le suafa o le Alii, ia manuia le malo ua o’o mai o lo tatou tamā o Tavita, Osana i mea e aupito i luga.” Sa ti’eti’e ane Iesu i le a’ai o ia o le Tupu silisili o le lagi ma le lalolagi. A’o le Tupu ua sau i le filemu, ma le lotomaulalo.

#### **GALUEGA FA’ATINO –**

1. E leai lava se isi fa’atinoga e sili atu mo fanau nei, nai lo’o le fa’atinoga ua masani ai, ia saunia tamaiti ma a latou laupama i lea taeao.

2. Ia fa’ailoa i tamaiti i se auala o le malaga fa’atoā tupu lava i le taimi lenā, i ni metotia a lau Susuga e fa’atino ai le malaga, ia aua lava ne’i toe galo, ae sili ai o lo latou malamalama i le mafua’aga.
3. Ona e leai ni tatou asini, e lē afāina pe ā afai e fa’aaogaina nisi auala o feoa’iga, a ia matuā manino tamaiti, i le tala ma ia taofi mau le a’ano ma le fa’amoemoe o le malaga o Iesu i Ierusalemā.
4. A maua foi ni ata e fa’amatala fa’atasi ma le tala, ua lelei tele lea, ona fa’ai’u loa lea i le fa’atinoga.

O le fa’amoemoe ua tatou masani ai i le molimau a le Tusi Paia i le tala lea, pei ta’i, o le fa’amatalaina e lau Susuga ia faigofie ma malamalama gofie i tamaiti. E lē tu’una ni a’oa’oga mo fanau, ae o le taofi mau lava, ia tapena muamua tamaiti i le matutua lea, ia iloa ma malamalama, ona taofi mau lea mo le aga’i atu i le lumana’i. E faigofie ai ona fa’auiga e i latou pe a matutua ni a’oa’oga mo lo latou olaga.

### MANUIA TELE LE ASO SA O LE LAUPAMA



**ASO SA – APERILA 20, 2025 “ASO SA O LE TOETU”**  
**MATAUPU – “UA TOETU IESU.” (UA TOE OLA MAI LE OTI)**  
**MATAIO – 28: 1 - 10**

**SINI** – “Ia a’oa’oina pea fanau ma fa’amautū i o latou loto ma agaga, e lē pepelo le tala i le toetu mai o Iesu nai le oti mai le tu’ugamau”

**FESOASOANI MO LE FAIAOGA** - E lē aveesea le fa’amamafa o le mataupu i le toetu o Iesu, po’o le toe ola mai le oti. O le tala lea e matuā tatau lava ona a’oa’oina pea ia matuā nofo i loto ma agaga o fanau, ina ia mautinoa le taofi mau ai i le fa’atuatua, i lo tatou talitonuga fa’akerisiano a’o tutupu a’e i latou, O le fa’amanatu ia fa’amatala o se tala e fou pea i le fa’aloga a fanau. Ua e masani i le tala, ae tu’ualalo atu pea fa’amolemole, ia tautuanā lau tapenaga i le vaiaso, e sologa lelei ai le a’oa’oina o le mataupu i le fanau ma faigofie mo lau Susuga. Fa’afetai le onosa’i malo le tapena.

**SINA FA’AMATALAGA MO LE TALA** – Ua tou iloa le mea mata’utia lea na tupu i le taeao lenei a tamaiti? Fai mai le tala, o le vaveao o le Aso Sa lenei , o lona uiga o le vaveao tamaiti, o le taimi e lē i malamalama lelei le aso. Ua leai se mea e paō ua to’afilemū mea uma. O le taimi lenā tamaiti na o ai tinā e asi le tu’ugamu o Iesu, lea na maliu ma tanumia i le aso Faraiile na te’a nei, a ea? Fai mai sa o lava ma talatalanoa po’o ai e fuliese le ma’a tele lava sa pupuni ai le gutu o le tu’ugamau. Ae o se mea mata’utia ma ofoofogia na va’ai i ai latou ina ua taunu’u atu i le tu’ugamau, ua matala mai ua fulieseina le ma’a sa i ai, a ua matuā ofo lava i le va’ai atu ua leai foi se tino o Iesu o i ai. Ae ua tete’i i le fa’alogo atu i le agelu o fa’apea ane, “Aua tou te matatau” (fefefe), ou te iloa o lo’o outou saili mai e asi Iesu na maliu. E lē o i’inei o ia, ua toetu mai o ia mai le oti. Va’ai, o le mea lea sa i ai lona tino. O ie foi ia na tanu ai o ia. Ae omai e o, ia outou fa’avave ma ta’u atu i ona so’o po’o ana uo, ua TOETU Iesu. Ua foi fafine ma le ofo ma le fiafia tele e ui ina e le’i va’ai i le tino o Iesu. Peita’i, ua latou ta’u atu i le ‘au so’o, ne’i faigata ona latou talitonu i lea tala, auā e le’i tupu muamua se mea fa’apea, o le toe ola o le tagata oti a ua tolu po i le tu’ugamau. Sa manatu le ‘au so’o o ni tala fa’atupu a fafine, o le ala lea o le taufetuli o Peteru ma Ioane i le tu’ugamau, sei va’ai pe moni le tala a fafine. Fai mai ua fai le miliga a le

to'alua lea, ma i'u ai ina muamua loane i le tu'ugamau, ae le'i alu i totonu. A e ina ua taunu'u Peteru ma alu i totonu ona la o ai lea o i laua uma, ma la mautinoa ai ma talitonu, ua leai se tino o Iesu. Ua la iloa na o ie na ta'ai ai le tino o Iesu, atoa ma ie na ta'ai ai lona ulu ua ta'atitia e le'i tago i ai se isi. Ua iloa e i laua e le mafai ona gaoia e se tasi le tino o Iesu, o lona uiga e moni lava le tala a fafine na asia le tu'ugamau. Ua toe ola mai Iesu nai le oti.

Ua foi atu so'o i le fale a'o Maria ua tu ma tagi i luma o le tu'ugamau ua le malamalama i le mea ua tupu (alofa fa'atinā). Peita'i, na ia va'aia se tagata, ae na ia manatu o le teu togāla'au o le fanua. Ona ia fai atu lea i ai, - alii e, alii e, afai ua e aveese o Iesu, fa'amolemole ta'u mai po'o fea ou te maua ai o ia, ae le iloa e Maria o Iesu moni a lea. Na fa'ate'ia o ia i le fa'apea atu o Iesu, "Maria e," o inā na ia iloa lelei ai o Iesu lea la te talanoa ina ua ia ta'u lona igoa. Ona matuā fa'atumulia lea o lona loto i le fiafia ma le olioli. Ae fa'apea atu Iesu, alu ma fai atu i o'u so'o latou te feiloa'i i se taimi o muamua i Kalilaia, latou te iloa ai o IA.

**GALUEGA FA'ATINO** – E ese mai le fa'amatalaina o le tala ma fa'amlamalama ni upu mo tamaiti i se gagana faigofie. O le fa'atinoga o le tala, o le fa'amautuina lea i loto ma mafaufau o tamaiti ia le toe galo. E lelei pea le fa'agaso lo i upu ma talanoaga o lo'o i ai i le Tusi Paia, ma le fesoasoani u tu'uina atu, auā e eseese lava molimau a tusitala i le tala lea.

#### **MANUIA LE ASO SA O LE ESETA**



#### **ASO SA - APERILA 27, 2025 "MATAUPU FA'AMANATU MO APERILA"**

##### **MATAUPU –"FESILI MA TALI"**

1. Toe aga'i tasi i tua e fa'amanatu ma fa'amalamalama atili mataupu i nai fesili e saunia.
  - O ai Sakari ma Elisapeta?
  - O le a le galuega a Sakaria?
  - O a taimi e osi ai taulaga pe a o'o ina tofia Sakaria i lana galuega?
  - O ai le igoa o le agelu na faaali ia Sakaria ma Maria?
2. O le a le fa'aaliga na iloa e Sakaria i le malumalu?
  - O le a se mea na fa'anoanoa tele ai lenei ulugalii?
  - Toe taumafai e fa'amalamalama le uiga o le upu Naseri fa'afigofie fa'amolemole?
3. Aiseā na gūgū ai Sakaria?
  - O ai le igoa o le atalii o Sakaria?
  - Na fa'apefea ona toe tautala Sakaria?
  - Saunia e lau Susuga nisi fesili ma fa'amatalaga pe afai ua tatau ai, ma le malosi o tamaiti
4. Toe fa'amanatu pea ma fesilisili fa'afigofie i fanau ia fa'amautu ai le tala i le malaga fa'atupu a Iesu, ma lona toetu mai le oti.
  - Manatua, o lo'o i totonu o le vaiaso lea po'o Aso Sa ia e lua le maliu o Iesu.
  - A'o le fa'amamafa o le laupama ma le toetu mai le oti o Iesu.
  - Afai e fa'aaogaina ni nai a'oa'oga mo tamaiti, ua lelei tele lea, fa'afetai le tapena malo le sauni.

Fa'amolemole o mataupu fa'amanatu o le toe ta lava lea i le fao ina ia maua ma taofi mau e fanau nai fesili ia. E fa'amatafaigofie lava e le faigata mo latou. Ae fesoasoani atu lava o lo'o i lau Susuga le tomai

ma le agava'a, e saili auala ai ia faigofie mo tamaiti. E lelei pea le fesuia'i o fa'aupuga ae tumau lava le tali, ina ia tele auala e pu'e mai ai e fanau le tali o le fesili. Fa'afetai tele mo galuega, fa'amanuia le Atua.

### **MALO GALULUE I LENEI MASINA, FA'AFETAI TELE LAVA.**

////////////////////////////////////

**ASO SA – ME 04, 2025**

**MATAUPU – “O LE FEAU NA FA'AALI IA MARIA”**

**TUSI FAITAU – LUKA – 1: 26 - 35**

**SINI** – Ia a'oa'oina le fanau ia fa'alogo ma iloa le fa'aaliga na o'o ia Maria le tinā o Iesu.

**FESOASOANI MO LE FAIAOGA** – Manatu o lo'o maua pea le onosa'i ma fa'apalepale i a outou Susuga i faiaoga. Fa'afetai le galulue. O le fesoasoani lava ua tu'uina atu i a tatou tusi e mo lau Susuga i au tapenaga. Ua na ona taumafai atu e fa'afaigofie ma lagolago atu i le galuega, ae o lo'o inā le tomai e fa'atino ai i auala ia malamalama ai fanau. E fautuaina malosi pea le saililiga ma tapenaga i le vaiaso a'o lumana'i ai le Aso Sa o lea mataupu ma lea tala. E fa'afetaia pea lo outou tautigā i le galuega auā fanau a le 'aulotu ma le Ekalesia. Manatua, o nai mataupu ia e fesoasoani i le fa'agasologa o tapenaga mo le Aoga Samoa ia tu'u māmāina mo le fanau i le tele o meaaoga i le nei vaitau. Fa'afetai tele le tapena.

**SINA FA'AMATALAGA MO LE TALA** – Ua fa'aauau mai le mataupu i le gūgū o Sakaria, i le tala o lenei taeao, i le fa'aaliga a le agelu ia Maria, e uiga i le fanau ai o Iesu. O le tala tamaiti, fai mai e ono masina talu ona uma le fa'aaliga ia Sakaria, ona 'auina lea o le agelu a le Atua i le a'ai po'o le nu'u ua mamao i gauta o Kalilaia, o lona igoa o Nasereta. O le nu'u lea sa mau pe nofo ai se teine taupou, ua igoa ia Maria. O ia o le teine o le 'au aiga o luta mai le aiga o Tavita (Luka 1: 32, Roma 1: 3). O Maria foi e aiga ma Elisapeta, lea sa tatou talanoa ai i le Aso Sa muamua a tamaiti. O ai foi la Elisapeta? Ioe, o le tinā lena o le tama o loane. Fai mai le tala, sa i ai le tama sa faufautane (mana'o e fia fa'aipoipo ia Maria) ia Maria, o lona igoa o Iosefa, e lē taumate la tamaiti ai a se 'aulelei o Maria a ea? Ae tou te iloa le mea mālīe tamaiti, o Iosefa, o le atalii o le kamuta (fa'amatala galuega a le kamuta). Fai mai na alu atu le agelu ma fa'apea atu ia Maria, **“O le ā afio ifo ia te ia le Agaga Paia ma o le ā to ai o ia.”** O le ā avea ai o ia ma tinā o se pepe tama. Na te fa'aigoa ia te ia o Iesu, O le Atua le Fa'aola, e silisili o Ia, e ta'ua foi o ia o Lē Silisili ese, ma o le ā nofo o ia i le nofoaiga a Tavita lona tamā, e fai o ia ma tupu i le aiga o lakopo e fa'avavau. (Luka 1:32). Tamaiti, o se mea na ofo ma te'i ai Maria, auā e le'i nonofo ma Iosefa, a'o lea o le ā to o ia, ioe, o mea e faia e le Atua mo le tagata, e faigatā ona iloa ma malamalama iai. O le to a Maria tamaiti, e aumai mai le Agaga Paia.

### **GALUEGA FA'ATINO-**

1. Ia fa'amatala ma maitau upu o le vaega lea e pei ona talanoaina. Ia fa'agata ai lava i'ina.
2. Ona taumafai loa lea e fa'atino le talanoaga i tagata o lo'o a'afia i le tala ma latou upu o lo'o i ai. Silasila pea i le Tusi Paia ma latou molimau e faigofie ai.
3. Fa'ata'it'aiga ; Maria, Iosefa, agelu, ma se fa'amatala upu.
4. Fa'afoe pea e lau Susuga ma fa'ata'ita'i i fanau le tala. Afai e lava le taimi, ia auua'i ane tamaiiti i le falatinoga ina ia olo uma i ai.
5. Fa'amatala le tala fa'atasi ma le Tusi Paia.

Malo le galulue, fa'afetai le pale, o le fa'amoemoe ia maua se iloa o fanau i lea vaega o le tala. E lē taofia ni a'oa'oga mo latou a ia faigofie ma aua le tele, o le a maua lava e i latou ni a'oa'oga aogā mo latou olaga a o aga i pea e tutupu ma ola i le talalelei. Fa'afetai le onosa'i.

### MANUIA TELE LENEI ASO SA



**ASO SA – ME 11, 2025 “ASO SA O TINA”**

**MATAUPU – “O LE ASIASIGA A MARIA IA ELISAPETA”**

**TUSI FAITAU – LUKA – 1: 39 - 56**

**SINI** – Ia a'oa'o tamaiti i le asiasiga a Maria ia Elisapeta ma le la talanoaga i le feau a le agelu ia te ia.

**FESOASOANI MO LE FAIAOGA** – O le Aso Sa taua lenei mo tinā uma, ma ua talafeagai foi ma le fa'agasologa o le tatou tala i le Tusi Paia mo tamaiti. E fa'ataua pea lau tapena ga o le mataupu, ma ia fa'ailoa foi i nai fanau le taua o ia tinā I tala a le Tusi Paia. O lau tapenaga lava o le a fa'amoemoe e fa'alautele ai le mataupu ma faigofie mo le fanau. Malo le onosa'i malo le tapena. Fa'afetai tele lava.

**SINA FA'AMATALAGA MO LE TALA** – Na matuā ofo Maria i lea feau mai le agelu ua ta'u atu ia te ia. Ae na talitonu lava lona loto i le tala a le agelu, o le mea lea na ia fa'apea atu ai i lana tatalo i le Atua. “Ina ia fai ia te ia e tusa ma lana fetalaiga”(Luka – 1: 28). Tamaiti, e fa'apena foi le mea na tupu ia Elisapeta na fanau mai ai loane. O Elisapeta, o le tinā o le aiga o Maria. O le ala lea na tula'i ai Maria ma alu e asiasi ia Elisapeta, ma se'i talanoa i lea fa'aaliga ua o'o ane ia te ia. Tamaiti, e fai si mamao o le malaga lea, fai mai e fa pe lima aso e alu ai le malaga, o se malaga umi, a ea? Ina ua taunu'u atu Maria i le fale o Elisapeta, ona fa'afeiloa'i fiafia lea e Elisapeta ma fa'apea atu ia Maria, “**Amuia oe i fafine uma, amuia foi le ā fanau mai ia te oe**” Ua ta'ua ai Maria o le tinā o le Alii, ma o inā na fa'amaonia ai upu uma a le agelu na fai ia Maria.. Ona fai ai lea o le vi'iga tele a Maria i le Atua.

Fa'amolemole lau Susuga sailiili ma su'esu'e i le vi'iga iloga lea a Maria o lo'o faamauina i le Luka – 1:39 – 56.

### **GALUEGA FA'ATINO –**

1. Fa'amolemole ia manatua o le Aso Sa lenei o tinā, ia o'o si nau tapenaga i le taua o tinā ma lo latou ola ai ma fanau. O tinā o le nei tala, e matuā tele a'oa'oga faigofie e mafai ona fa'ama'ite i fanau, ma ia avea ma ala e alolofa ai ma usiusita'i i o latou tinā.
2. E fautuaina le fa'aaoga o le vi'iga a Maria i le Luka – 1: 39 – 56, e faitau ma fa'amasani ai tamaiti ma fa'ailo ai le mafua'aga o lea pese ma lona taua.
3. Fai ni nai fesili e toe fa'amanatu ai le tala, ma toe fesili foi i nai mataupu ua mavae auā o lo'o fa'agasolo mai ai i'ina a tatou aoga.
4. Fa'atino e ni tamaita'i se to'alua le talanoaga ona faitau fa'atasi lea e le vasega le vi'iga.
5. Afai foi e te silafia se fati o lea pese, e lelei foi lea, ae aua le fa'afaigatāina.

Aua le taofia ni a'oa'oga pe afai e te manatu i ai. A'o le taofi vaivai lava ia fesoasoani i fanau e lē gata ina iloa ma taofi ia tala, a'o le tapenaga ia faigofie mo le Aoga Samoa. Fa'amoemoe lava o lo'o tatou ta liu i le va'a e tasi i se taumafai atu i lenei foi 'afa tausaga, ona o le tele meaaoga o lo'o feagai ma fanau, ae ua maua sia avanoa e a'oa'oina ai e lē gata i le Aoga Aso Sa, ae tapena atili ai foi mo le Aoga Samoa ma le tele o meaaoga e ao.

### MANUIA TELE LE ASO SA O TINA





**ASO SA – ME 18, 2025**

**MATAUPU – “UA TOE FO’I MARIA I NASARETA”**

**TUSI FAITAU – MATAIO - 1: 19 - 21**

**SINI** – Ia a’oa’oina tamaiti ia iloa le mafutaga a Maria ma Iosefa na fanau mai ai Iesu

**FESOASOANI MO FAIAOGA** – Ia tautuana pea le tapenaga fa’amolemole, e itiiti le parakalafa lea ua a’oa’oina i lenei aso, a’o le talosaga ia fa’afaigofie ona fa’afeso’ota’i aga’i le amataga mai o le tala. O le fa’amoemoe ia maua e tamaiti le gasologa o le tala ma ia taofi mau ai a’o tutupu a’e. Ou te taofi o se fesoasoani tele lava lea mo le tapenaga o le Suga Samoa ma le tele o mataupu e a’oa’oina ai tamaiti. Fa’afetai tele le galulue i a outou Susuga.

**SINA FA’AMATALAGA MO LE MATAUPU** – O se feiloa’iga matagofie le feiloa’iga a Maria ma Elisapeta sa o tatou iloa i le Aso Sa ua te’a. E lē gata o le feofoofota’i fa’ale-aiga, a’o le talatalanoa ma manatunatu i fa’aaliga ua faia e le Atua ia i laua. Ua matua Elisapeta ae toe maua le la tama, maitaga Maria ae le’i nonofo ma Iosefa, o ni mea ofoofogia ia ua vivii ai nei tinā i le Atua. Tamaiti, o le mataupu i le taeao lenei, o le toe foi o Maria i lona nu’u o Nasareta, ina ua uma lana asiasiga ia Elisapeta, pe a ma le tolu masina sa nonofo fa’atasi ai i laua i le fale o Elisapeta. O le mea ua tupu tamaiti, e foi atu Maria i lona nu’u, ua iloa e Iosefa o le a fanau Maria, ae la te le’i nonofo. O se mea na matuā tigā ai Iosefa ina ua to Maria ae lē iloa e ia pe mai fea. O Iosefa o le tagata amiotonu, sa lē manatu foi e vave sona ita ia Maria, ae ua manatunatu ma mafaufau lelei se togafiti e fa’ate’a lemū ai ia te ia le mea ua tupu, ina ia le maasiasi o ia i luma o tagata. (Mataio – 1: 19). Fai mai a’o mafaufau pea o ia i lea mea ua tupu, ae fa’aali loa le agelu ia te Iosefa e ala i le miti. O le miti o le poloaiga ia Iosefa, aua le fefe o ia, ae alu e avea Maria ma ana ava (to’alua), auā ua to o ia ina ua alu ifo i ai le Agaga Paia. Fai mai foi le agelu i lana miti, O le tamatane o le a fanau mai ia Maria, na te fa’aigoa ia te ia o Iesu, auā e fa’aola e ia lona nu’u ai a latou agasala (Mataio – 1: 21)

**GALUEGA FA’ATINO –**

1. Afai e mafai ona e tapenaina le asiasiga a Maria ia Elisapeta o se mea lelei tele lea mo le soso’oina mai o le tala lenei.
2. Talatalanoa i fa’aaliga ia i laua, soso’o ai ma le fa’amavaega o le a toe foi Maria i Nasareta.
3. Ona sui loa lea o le ata ia Iosefa ma ona mafaufauga, tigā o lo’o iai.
4. E fautuaina pea le fa’ata’it’ai e lau Susuga aga a Iosefa ona fa’ata’ita’i lea e tamaiti.
5. F’aa’u loa i le miti a Iosefa ma upu o lo’o i ai ina ia vave ona taofi e tamaiti.

O le fesoasoani lava, ia faigofie ni a’oa’oga mo tamaiti ae sili lava mo i latou ia iloa ma malamalama i le tala. O le fa’auigaina o le tala ma ni feau aoga mo i latou o le galuega lena mo vasega o lo’o i luga, ma fa’asolo atu ai ina matutua. Malo lava le onosa’i.

**MANUIA TELE LE ASO SA**

////////////////////////////////////

**ASO SA – ME 25, 2025 ‘MATAUPU FAAMANATU’**

**MATAUPU –“FESILI MA TALI O LE MASINA O ME”**

1. O le feau na fa’aali ia Maria  
-T oe fa’amatala ma saga fa’amalamalama le feau a le agelu ia Maria i le parakalafa lenā
2. O le asiasiga a Maria ia Elisapeta.

- Fa'amatala le parakalafa lenā ina ia iloa e fanau le mafua'aga na asiasi ai Maria ia Elisapeta.
- la fa'amanatu i tamaiti le vi'iga a Maria o lo'o tusia i le Luka – 1: 39 – 56
- Aiseā na vivi'i ai Maria i le Atua?

3. Ua toe foi Maria i Nasareta?

- Fa'amatala ia taofi mau e tamaiti le mea na tupu ia Iosefa ina ua toe foi Maria i Nasareta?
- Toe fa'amatala i tamaiti le miti a Iosefa mai le agelu, e uiga ia Maria?

Saunia pea e lau Susuga nisi fesili mo tamaiti pe a ua tusa ai. Ae tulituli pea le fa'amoemoe o tatou fesili i le sauni atu ai i le Suega Samoa mo le Tala Tusi Paia. Aua nei taofia nisi faiga lelei e te saunia ia fua tele ai lo tatou fa'am oemoe tapena mo fanau, ma iloa atili ai tala o le Tusi Paia. Fa'afetai tele le fa'amalolosi fa'afetai le alolofa I fanau.

### MANUIA TELE LE ASO SA FAAIU O LENEI MASINA



**ASO SA – IUNI 01, 2025**

**MATAUPU – “UA FANAU MAI IOANE LE PAPTISO”**

**TUSI FAITAU – Luka – 1: 61 - 79**

**SINI** – la iloa e tamaiti le fanau mai o Ioane ma le mea na tupu iā Sakaria lona tamā

**FESOASOANI MO FAIAOGA** – Ou te taofi ua tatou taunu'u mai i le fa'ai'uga o a'oa'oga a le fanau i lenei tausaga. Fa'afetai ai foi i lo outou onosa'i tamaiti i le tele o meaaoga e lē gata i aoga palagi, Aoga Aso Sa, ae manatu foi ua ma'ea atu ai ma Aoga Samoa mo nisi pulega, ae ua fa'atotoe nisi pulega mo lenei masina. Fa'afetai tele i a outou Susuga le onosa'i ma le lagolago i le 'au faigaluega Faifeau mo le galuega tele o le nei 'afa tausaga. O nai tapenaga fa'ai'u lava, o le ā mautinoa ai le lē popole o i latou i a latou tali o le Tala Tusi Paia, ona o avanoa sa fesoasoani ai ia i latou e ala i le Aoga Aso Sa. Manatu foi ua fesoasoani lenei fa'ama'ite e fa'amāmā ai le galuega, ona o le tele o le pisi e feaga' ma outou Susuga .

**SINA FA'AMATALAGA O LE TALA** – Tamaiti manatua foi le tala a le agelu na fai ia Sakaria e fanau e lona to'alua o Elisapeta se tama tane. Ioe, fai mai le tala tamaiti, na taunu'u lava le mea lenā, e ui i le lē talitonu o Sakaria ma gūgū ai, ae na taunu'u lava e pei ona fa'ailoa i ai e Kaperielu le agelu. Ua fanau lava Elisapeta ua lo'omatua o ia. Ina ua o'o i le valu o aso talu ona fanau o ia, ona ave lea o le tama i le malumalu e peritome ai e tusa ma tu ma aga fa'a- lutaia. Ua to'atele tagata na fa'atali i le igoa o le tama, auā ua manatu tagata e tatau ona fa'aigoa ia Sakaria lona tamā, ma le isi mea, e leai foi se tagata o lo latou aiga e igoa ia Ioane. Peita'i, na latou fa'atali ia Sakaria po'o ai le igoa o le tama. Ona genogeno ane lea o Sakaria e avatu le papatusi ma ia tusia ai upu nei **”o Ioane lona igoa”**. Tamaiti, o le taimi lava lea na toe matala ai le laulaufaiva o Sakaria ua toe tautala. Ona fai ai lea o lana vi'iga i le Atua i lona fa'amaoni ua fanau ai lona atalii, o le manuia lea mo ia ma lona aiga. Auā o lona atalii, e muamua atu i luma o le Alii e saunia ona ala” Tamaiti, o le uiga o le igoa o Ioane o **”le alofa tunoa o le Atua”**

**GALUEGA FATINO –**

1. Fa'amatala lelei ia malamalama ma manino tamaiti i le fa'aigoaina o Ioane.
2. Toe fa'amalamalama pe na fa'apefea ona toe tautala Sakaria na gūgū?

3. Fa'amamafa i lau tapenaga le feau a loane e fai mo Iesu o lo'o taua, "O loane e muamua atu i luma o le Alii e saunia le ala mo le Alii" O lona uiga faigofie, o loane o le teuteu ala mo le Alii o Iesu, e saunia loto o tagata i le fanau mai o Iesu.
4. Ua e silafia lava nisi fesili ma le fa'atalatalanoa pea o le tala ia faigofie ma taofi e tamaiti.

### MANUIA LE TAPUAIGA O LE ASO SA



#### ASO SA – IUNI 08, 2025 “ASO SA O LE PENETEKOSO”

#### MATAUPU – “O LE A LE UIGA O LE UPU PENETEKOSO”

#### TUSI FAITAU – GALUEGA – 2: 1 - 4

**SINI** – Ia a’oa’oina ma fa’amamafa i fanau le uiga o le upu Penetekoso, ia mautu a’o le’i matutua ma lē iloa.

**FESOASOANI MO FAIAOGA** – Ua ou manatu e lelei ona fa’amanatu atu lau tapenaga mo lenei aso taua o le Ekalesia. Ia fa’amamafa i fanau tau lava o le uiga faigofie o le upu Penetekoso, ma nai nisi mea iti faigofie e uiga i lea aso. Ae ta’oto pea le loloto o le Penetekoso mo le aga’i ina matutua. Tautuana o lo’o i lau Susuga lava le tomai e fa’afoe ai se lagona vaivai ua ta’oto atu. Saili pea i le Tusi Paia ma nisi foi tusi e fesoasoani mo le mataupu. Malo lava le tapena fa’afetai le onosa’i.

**SINI MANATU MO LE MATAUPU** – E i ai lava le talitonuga e tatau pea ona amata a’oa’oina le fa’alogo ma le manatunatu o fanau i le nei aso fa’apitoa o le Ekalesia. E leai foi se manatu e tu’u i le loloto le a’oa’oina ia i latou auā e laiti o latou mafaufau ma galo gofie mea pe a faigatā. O le ala lea o le sōsō atu tatou amata i manatu faigofie mo i latou a’o tutupu a’e pea.

***O le aso Penetekoso, o le lima sefelu (50) aso talu ona toetu mai Iesu i le tu’ugamau ma le oti, ona afio a’e lea i le lagi.*** Manatua foi tamaiti, na folafola e Iesu i ona so’o, e afio a’e i le lagi ona ‘auina ifo lea o le Agaga Paia o le Fesoasoani mo i latou, e maua ai le malosi e fa’aauau ai le tala’iga o le malo o le Atua i le lalolagi. O le Agaga Paia foi lea e talitonu i tatou tamaiti o le Peresona lona tolu o le Atua o lo’o mafuta ma i tatou i Itaimi uma. O fesoasoani sili lea tatou te maua ai le malosi i faigata o le olaga.

O nai fesili faigofie ia e amata ona a’o tauloto e fanau e taofi mau ai le iloa o le Agaga Paia.

1. **O ai le Agaga Paia?** O le peresona lona tolu lea o le Atua Tolu Tasi, le Tama, le Alo, ma le Agaga Paia.
2. **O le a le Agaga Paia?** O le siufofoga o le Atua ua lagona i o tatou loto.
3. **Pe mafai ona talia le Agaga Paia e tamaiti?** Ioe, auā ua folafolaina e le Atua, o le ā liligi ifo lona Agaga Paia i luga o tagata uma lava.
4. **Po o le a le mea na tupu i le Aso Penetekoso?** Ua fa’alogoina le ta’alili ma latou iloa laulaufaiva afi i o latou luga, ma ua tautala ai i gagana eseese.

#### GALUEGA FA’ATINO -

1. E leai se manatu ia a’o ia maua fesili ua tu’uina atu mo le mataupu.
2. Ae lelei le avea o ia fesili e fai ma aula e fa’alautele ai le fa’amatalaina o le mataupu

3. Saili lava le auala faigofie e fa'amatala ai ma iloa e malamalama ai le Penetekoso.
4. Afai foi e mafai e au tamaiti ona a'o fesili ia ua tu'uina atu, o se fa'afetai tele lea.
5. Ia fa'amamafa le fa'alogo ma taumafai e tauloto nai tali mo a tatou fesili.

**FA'AFETAI TELE LE ONOSA'I, MALO LE FA'AMALOLOS**



**ASO SA – IUNI 15, 2025 “ASO SA O TAMA”**

**MATAUPU – “UA AVEA ISA'AKO E OSI AI LE TAULAGA”**

**TUSI FAITAU – KENESE 22: 1 - 19**

**SINI** – Ia a'oa'oina pea le fanau i le fa'atuatua o Aperamo i le Atua, e ala mai ai manuia i le tagata.

**FESOASOANI MO FAIAOGA** – O le tala ua laulau vivilu ai a outou Susuga i Faiaoga, Ae ou te manatu o le lelei lena o le silafia o lea tala, o le a faigofie atili ai ona a'oa'oina pea mo nai fanau laitli ia. Ia manatua o le Aso Sa lena o tamā, e lē o Isaako la le fa'amamafa e tusa ai o le tala, ae ave pea le fa'amamafa ia Aperamo le tamā o le 'au fa'atuatua. Tautuana lava lau tapenaga ia masani ma le Tusi Paia, e talitonu lava o le a a'oa'oina ai le mataupu fa'apei o se mea fou fa'atoa tupu i le fa'alogo a fanau i nisi metotia oi lau Susuga. Malo le tapena.

**SINA FA'AMATALAGA I LE TALA** - E lē faigofie lea mea iā Aperamo, o se mea tigā tele lea ua mana'o i ai le Atua. O ona po o nofo i lona aiga i Peresepa, na o'o ai lea afioga faigatā a le Atua ia Aperamo. “Na poloa'i le Atua ia Aperamo, ia ave lona atalii e to'atasi, o lē ua pele ia te ia e osi ai le taulaga mu i le Atua” Tamaiti, e lē faigofie i se tamā po'o ni matua ona ave se la tama e fasioti e osi ai se taulaga i le Atua, a ea? Ae fai mai le tala, e le'i fa'aletonu le mafaufau o Aperamo i lea mea, a ua tula'i ma ave Isaaako lona atalii ma o atu i le mauga o Moria na fa'asino e le Atua ia te ia e osi ai le taulaga. Ua ala Aperamo i le taeao ma fa'anofoa lana asini, ma ave ni ana taulele'a ma Isaako lona atalii ma amata loa le malaga. Ua tolu aso o le malaga, ae iloa atu loa le nofoaga e osi ai le taulaga. Ona fa'atali lea o taulele'a, a'o Aperamo ma lona atalii ua o atu pea e fa'ataunu'u le poloa'iga. ***(Ua e masani ma le talanoaga a Aperamo ma lona atalii seia o'o ina malie le loto o Isa'ako e fuisusia o ia mo le taulaga mu, fa'amolemole silasila ane i ai, e lē toe tau tusi atu).*** Ua fa'ae'e Isaako i luga o le fata faitaulaga e Aperamo lona tamā, ona a'apa atu lea o ia i le polo (naifi), o le a fasioti lona atalii, ae fa'alogo loa i le leo mai le lagi ua vaoia o ia ma fa'apea mai, ***“Aperamo e, soia le o'o lou lima i le tama”***

Ua mavae atu le tofotofoga, ma ua matuā iloaga le fa'atuatua o Aperamo ma lona 'ana'ana i le Atua. Na saunia ai lava e le Atua se tama'i mamoe e osi ai le taulaga, a ua fa'asaoina Isaako ona o le fa'atuatua o lona tamā i le Atua. Ona fa'aigoa ai lea o lea mea o leova – Irae, o lona uiga o le Alii na te aumaia, e pei ona iloa i nei ona po, e iloa le Alii i le mauga. Ua lē gata i lenā a ua toe fa'apea mai le Altua ia Aperamo, O lana fanau e manuia ai atunu'u uma o le lalolagi, auā ua ia usiusita'i i le Atua.”

**GALUEGA FA'ATINO –**

1. E fautuaina pea le fa'atino o le tala i upu o lo'o i ai i le Tusi Paia, e faigofie i le fanau ona malamalama ai.

2. E fa'amatala e lau Susuga a le faiaoga ae fa'atino le fanau.
3. O tautalaga a tagata ta'ito'atasi ia fa'aaoga tamaiti ma fesoasoani i ai aemaise o taga o upu ia faigoie.
4. Fai ni nai fesili i le fanau e uiga i le aso o tama mai le tala.
5. E lelei foi pe a fesili pea i ai, pe so'o o latou tamā ia Aperā'amo le fa'atuatua i le Atua.
6. Ma nisi tapenaga sa e tapena i ai ina ia fou lenei tala i le fa'alogo a fanau.

**MANUIA TELE LE ASO SA O TAMĀ**



**ASO SA – IUNI 22, 2025 “MATAUPU FA’AMANATUA”**

**MATAUPU – FESILI MA TALI**

1. Ua tatou o'o mai i le Aso Sa mulimuli lenei o aoga o le 'afa muamua o le tausaga.
2. Ua i ai le manatu o le a taoto atu i a outou Susuga i faiaoga, pe faia se su'ega mai le amataga seia o'o mai i le Aso Sa ua mavae pe fai foi se suiga
3. E lelei foi le saunia o ni nai ta'aloga o le Tusi Paia e fa'auma ai le 'afa muamua o le tausaga, ma tufa ni nai chips ma tamaiti, po'o sina aisakulimi foi.
4. Ae afai e te manatu e toe fa'amanatu matupu uma lava i ni nai fesili e talanoaina e lelei foi lea ia mautinoa le malosi o le latou taofi ma le pu e ua i ai.
5. Fa'aiu i se fa'amalosi a a outou Susuga i fanau ina ia tautuana le tu'uaga, ia saogalemu ma ia manuia ma toe feiloa'i ai i le lumana'i.
6. Ua ma'ea galuega tau a'oa'oga e tele, a le fanau sa feagai ai, ua sauni mo le tu'uaga umi, ae lelei pea ona fa'afetia i ai i lo latou onosa'i ma fiafia i le Aoga Aso Sa ma isi aoga e tele.
7. Fai se fa'amanuia mo i latou ma malolō ai lea mo le isi 'afa mulimuli pe a aulia i le alofa o le Atua.

IA MANUIA TELE LE TU'UAGA O LE TAU MAFANAFANU, TAUSIA E LE ATUA ALOFA LE OLA O FANAU MA TATOU UMA, TATOU TE TOE FEILOA AI. TATOU FEILOA'I IA AUKUSO. FA'AFETAI TELE LE ONOSA'I FAIAOGA, MALO LE GALULUE, FA'AMANUIA ATU LE ALII.

